



KEMENTERIAN DALAM NEGERI

PEKELILING AGENSI PERSENDIRIAN BILANGAN 1 TAHUN 2010

Semua Syarikat Kawalan Keselamatan

PERTUKARAN AHLI LEMBAGA PENGARAH/PEMEGANG SAHAM SYARIKAT KAWALAN KESELAMATAN

TUJUAN

1. Pekeliling ini bertujuan untuk memaklumkan kepada semua Syarikat Kawalan Keselamatan Persendirian mengenai **Garis Panduan Pertukaran Ahli Lembaga Pengarah/Pemegang Saham Syarikat Kawalan Keselamatan**.

LATAR BELAKANG

2. Kementerian Dalam Negeri telah menetapkan syarat permohonan lesen agensi persendirian di bawah Seksyen 3, Akta Ejenji Persendirian 1971 bagi lesen 2 (a) dan 2 (b). Antaranya adalah:

2.1.1 salah seorang pemegang saham terdiri daripada bekas pegawai tinggi Polis Diraja Malaysia yang berpangkat sekurang-kurangnya SAC II yang memegang 30% ekuiti saham syarikat; ATAU

2.1.2 salah seorang pemegang saham terdiri daripada bekas pegawai tinggi Angkatan Tentera Malaysia yang berpangkat sekurang-kurangnya Kolonel yang memegang 30% ekuiti saham syarikat; ATAU

- 2.1.3 salah seorang pemegang saham terdiri daripada bekas pegawai awam dalam kumpulan Pengurusan dan Profesional yang pernah berkhidmat dalam sektor keselamatan sekurang-kurangnya selama lima (5) tahun yang bergred 52 dan memegang 30% ekuiti saham;
DAN
- 2.1.4 pegangan saham syarikat dimiliki oleh bumiputera sebanyak 70%.
3. Kementerian melalui Surat Pekeliling Agensi Persendirian Bil. 1/2006 Para 5, Syarat-syarat Lesen Di Bawah Seksyen 3 Akta N0.27/71 (Lampiran A) yang bertarikh 7 Ogos 2006 menetapkan perkara berikut:
- “sebarang pertukaran Pengerusi, Pengarah Urusan/Pengarah Eksekutif, Pengarah atau Pemegang Saham hendaklah mendapat kelulusan terlebih dahulu daripada Menteri Dalam Negeri dengan menyatakan sebab-sebab pertukaran perlu dibuat”*
4. Walau bagaimanapun, Kementerian mendapati sejak akhir-akhir ini terdapat kecenderungan syarikat kawalan keselamatan melakukan penstrukturan lembaga pengarah dan pemegang saham syarikat tanpa kebenaran/kelulusan Kementerian seperti:
- 4.1 pengarah/pemegang saham dari kalangan bekas polis atau tentera atau penjawat awam gred 52 ini melepaskan pegangan saham 30% dalam tempoh yang singkat selepas kelulusan lesen agensi persendirian diperolehi;
- 4.2 menukarkan pegangan ekuiti saham individu kepada pegangan saham perbadanan atau syarikat; dan
- 4.3 menjadi pengarah/pemegang saham atau pengurus lebih daripada sebuah agensi persendirian.

GARIS PANDUAN MENGENAI PERTUKARAN AHLI LEMBAGA PENGARAH/PEMEGANG SAHAM SYARIKAT KAWALAN KESELAMATAN

5. Kementerian melihat perkara ini berlaku kerana tiada dasar dan peraturan yang jelas mengenainya menyebabkan syarikat melakukan perubahan lembaga pengarah dan saham tanpa kebenaran dan kelulusan Kementerian terlebih dahulu. Justeru bagi menjamin kawalan ke atas syarikat berterusan maka **Kementerian telah membuat ketetapan berikut:**

- 5.1 sebarang pertukaran pengerusi, pengarah urusan/pengarah eksekutif, pengarah atau pemegang saham hendaklah mendapat kelulusan terlebih dahulu daripada Menteri Dalam Negeri;
 - 5.2 pengarah/pemegang saham dari kalangan bekas polis atau tentera atau penjawat awam gred 52 (sektor keselamatan) perlu berada dalam syarikat sekurang-kurangnya untuk tempoh 10 tahun;
 - 5.3 sebarang pertukaran pengarah/pemegang saham dari kalangan bekas polis atau tentera atau penjawat awam gred 52 (sektor keselamatan) yang kurang dari tempoh 10 tahun yang dibenarkan dengan syarat melibatkan kes kematian atau muflis atau masalah kesihatan (pengesahan doktor Kerajaan diperlukan). Pertukaran/penggantian boleh dilakukan kepada waris terdekat atau jika tiada, penggantian boleh dilakukan dengan bekas polis atau tentera atau penjawat awam (sektor keselamatan) sekurang-kurangnya yang sama taraf;
 - 5.4 seseorang pengarah/pemegang saham tidak dibenarkan menjadi pengarah/pemegang saham kepada lebih dari sebuah agensi persendirian;
 - 5.5 pemilikan ekuiti saham oleh individu;
 - 5.6 pegangan saham syarikat dimiliki oleh bumiputera sebanyak 70%; dan
 - 5.7 pemilikan saham dan syarikat adalah milik warganegara.
6. Kementerian merasakan bahawa pengekalan pengarah/pemegang saham dari kalangan bekas polis atau tentera atau penjawat awam gred 52 (sektor keselamatan) untuk suatu tempoh masa tertentu adalah bagi menjamin kedudukan mereka daripada digunakan oleh mana-mana pihak untuk tujuan mendapatkan lesen agensi persendirian semata-mata.
7. Kementerian berpendapat bahawa pemilikan saham/syarikat oleh warganegara adalah bagi menjamin kawalan keselamatan tetap berada di tangan rakyat Malaysia. Tambahan pula, matlamat di sebalik penubuhan agensi persendirian ini sebagai *third line* kepada barisan pertahanan negara, malahan dalam keadaan tertentu khidmat agensi persendirian boleh digunakan oleh Kerajaan.

8. Kementerian juga melihat dengan wujudnya dasar ini maka syarikat-syarikat kawalan keselamatan tidak boleh melakukan sebarang penstrukturan syarikat tanpa mendapat kebenaran dan kelulusan terlebih dahulu.

KUASA-KUASA BERKAITAN


9. Pekeliling ini dikeluarkan selaras dengan Seksyen 18, Akta Ejen Persendirian 1971 bagi tujuan mempertingkatkan lagi perkhidmatan syarikat kawalan keselamatan.

10. Kegagalan mematuhi Pekeliling Agensi Persendirian Bilangan 1 Tahun 2010 ini boleh menyebabkan syarikat boleh dikenakan tindakan di bawah Seksyen 4 (1), Akta Ejen Persendirian 1971.

TARIKH KUATKUASA

11. Pekeliling Agensi Persendirian Bilangan 1 Tahun 2010 ini berkuat kuasa serta-merta mulai tarikh ia dikeluarkan.

"BERKHIDMAT UNTUK NEGARA"



(DATO' SRI MAHMOOD BIN ADAM)
Ketua Setiausaha
Kementerian Dalam Negeri

Tarikh: 06 Januari 2010

Salinan kepada:
Persatuan Perkhidmatan Kawalan Keselamatan Malaysia (PPKKM)